

重脩福山縣志序

福邑自康熙十二年奉文徵志
付史館前邑令東里羅君同邑
士大夫纂輯成書迄於今九十
有餘載矣其間星野介區山川
流峙固皆百世不易至於戶口

序一

之繁衍職官之因革已月異而
歲不同若夫德業文章之著孝
義節烈之行科甲聯翩之盛尤
津，於人齒頰間足以光史冊
而垂竹帛者也前或欲修而未
果或修之而未成積累既久採

輯愈難倘仍因陋就簡一邑之
文獻無考居官之責守謂何余
也承乏茲土倏爾四年於地方
事宜頗有見聞惟是簿書碌碌
未遑專心用是延請耆碩名儒
及同邑諸君子遠採博訪虛公

纂修又復廣其門類增為十二
卷是者因之訛者正之缺者補
之兩閱月尚炳炳烺烺舉九十
餘年之事務損益三十一社之
人物言行盡蒐羅而編紀之而
余亦以固陋之學釐定考核叅

未議於其間不任已私不徇物
好存至公而秉直道是則余可
信於福邑士大夫邑之士大夫
亦可見諒於余者耳是為序時
乾隆二十八年歲次癸未

勅授文林郎丙辰科舉人知福山

序一

三

縣王屋何樂善撰并書



序

邑之有志猶一邑之史也按周禮春官既設大史內史復佐以小史掌邦國之志外史掌四方之志固統紀天下國家之事而隱括無遺者也區。邑志何得與國史絜量然均此紀事之書合則史分則志

序二

合職其要分必職其詳。者垂之簡冊考古証今永為一鄉之鑒觀上之

廟廊授綱絜領即為一朝之信史邑志實國史之先資所係豈淺鮮也哉福志自康熙癸丑以後迄今將及百年未經脩補其間時異勢殊盛

衰興廢筆不勝書若不及今採集
將來愈久愈湮文獻無徵雖欲尋
踪覓跡其道無由幸遇 邑侯何
公蒞任四載凡有關於地方事宜
廢者脩之墜者舉之興利除弊無
不以次就理尤切、以邑志久缺
為今日要務屬余輩同人共訂正

而續輯之余屏居多年自甘守拙
兼以樗櫟之材既老且病深愧不
克勝任但念一邑公務又重以
邑侯之命何敢以耄荒諉卸猶憶
雍正乙卯先大人年逾古希承邑
侯程公命同邑中士大夫續脩舊
志而人心不古動思濫入嘖有煩

言遂閣筆而未竟厥緒越數年邑
侯宗公復延鄉先生重行脩輯亦
未竣而中止誠憾事也嘗聞先大
人有言紀載之詞欲其簡不欲其
繁昔夷尹柳下之聖孟子以清任
和三字了之何簡切如鉄筆也竊
思言期於簡·生於斷·生於識

彼患詞多者坐無識耳新唐書文
省而事增五代史約為一史歐陽
公之識也福以彈丸地條例多端
不亞大邑則簡之難哉且繁則易
枉簡則能直但邑志與國史有同
亦有異星野之區分山川之形勝
方域之廣狹皆有定局紀事者得

失在詳畧而無枉直志與史同之
惟志內人物史例邪正兼收勸懲
顯示不虛美不飾惡謂之直筆以
邑人而為邑志非葭莩之親即洽
比之隣雖有美無刺尚疑其美有
未盡此其與史異者也則直之難
哉余以老病之軀學殖久荒乃掉

三寸不律偕同人謬應 邑侯命
兼完先大人未竟之功雖分之所
宜實才之所絀也幸前編未廢勉
續其後以脩史館之採擇而是非
去取一惟 邑侯折衷至於易舊
為新裒多益寡遠不敢失之掛漏
近不敢失之濫觴其果能盡乎簡

與直之道耶所不敢知也昔宋人
詩云誰知鶴髮殘年叟猶解蠅頭
細字書披閱者當必靦然笑曰絕
少史筆但類鈔胥後來博雅君子
踵其事以補所未逮俾成不刊之
典是不佞所厚望也

乾隆二十七年壬午初冬之吉邑

序二

人蕭劼撰時年七十有八



敘
今

上御極之二十七年中州何老父臺
涖吾邑者凡四載矣公君子人也
以文學飾吏治整飭廢墜釐然具
舉茲復有纂修邑志之役邑志舊
有成書肇造於康熙癸丑當時躬

序三

操秉筆之任者實吾曾祖先司徒
公歷今且九十年其間人文蔚起
甲第聯翩爵里姓氏之可指數者
固已照耀人耳目而窮陬僻壤偉
人列女姓往以奇節著聞世愈久
而老成彫謝諮訪無人懼泯泯焉
夫前人之節概端賴後人之表揚

邑雖建置日淺乎顧百里內山川之孕毓風雨之滌會由漢迄宋中豈無人士可表見乃漸滅無聞旁藉他書無隻字傳者則邑乘所係不綦重哉余忝任分修陪諸君子後雖文詞弁鄙不敢參作者之林而表揚潛伏必徵實始可傳信斷

不敢稍涉瞻徇求米千斛為乃公作佳傳重負作者意又福邑建自阜昌自上蔡碑記沉埋古跡流傳者絕少獨念金源大定以來涖茲土者應有著作通都大邑不概見或散著於斷碑荒剝間乃搜剔無遺獲散文幾寶若拱壁夫酷嗜碑

版文字固文人結習使然要有關
於政典甚鉅今書已告成矣踵事
有增視前志加詳敘引書記有宜
因者不敢廢有審時奪勢必宜訂
正者亦無容墨守陳編依然吾先
人之志事而已至不牽浮言不徇
請託以俟志局則尤皆吾邑侯

主持之力也余得藉手以無羞隕
越何厚幸與

乾隆二十七年歲次壬午無射之
月邑人王積熙撰於養素堂



福山縣舊志序

皇上御極十有二年

允大臣遵

諭條奏下令各省徵志付史館彙修以昭一統

盛典余蒞任福山春月卽奉藩憲檄時值亢暘邑小民貧官紳士庶方憂旱祈禱實未遑修舉後天澤沛而秋成有望遂敦請名紳碩儒公議纂輯閱月而藁成竊意志之修非徒以其文也使徒以文若古風雲月露辭點綴足觀何裨於國

福山縣志

舊序

一

家之治夫邑之有志猶國之有史以存直也以傳信也如志天星而分野有辨志沿革而創設可考志疆域山川而形勝以列志科貢知登譽髦之選者何代之哲志職官知著民社之績者何時之吏志戶口知載王朝之版者幾何人志田賦知急公家之稅者幾何里以及忠孝節義有志則人知激勸祥瑞災異有志則人知修省物產風俗古蹟藝文各有志則知其地之可採而陳者幾何事彰往詔來移風善化志之所關

誠非淺鮮也余日事簿書愧無能贊一詞志成
得以藉手報命聊附數言爲序

康熙癸丑歲八月中秋

賜進士文林郎知福山縣事東里羅傳題於邑之退

思堂



舊志序

古者掌記時事列邦皆有史冊自封建制廢而郡邑之志始出志者誌也山川戶口於是乎書人物風俗於是乎書諸如政教禮樂兵農錢穀之類悉於是乎書是則一邑之志卽當年一國之史也今

朝廷德教翔洽車書一統閣臣覽宇圖之無外思簡冊之宜新請修一統志甚盛舉也因而直省郡縣各纂舊志福侯羅公才高班馬用董厥成首

福山縣志

舊序

三

以筆削屬余余屢謝不敏而公固強之因不揣固陋與邑之諸君子勉強從事焉余竊謂福雖彈丸小邑而奇峯峙其南大海匯其北加以二水如帶四山環遶亦海岱一巨觀也其民力田而好義其士敦詩而說禮淳淳穆穆論者以爲有三代遺風自故明迄今其間以經濟酬世文章華國者固指不勝屈亦有騷人墨客或賦詩或贈答自放懷於山巔水涯之間他若忠臣孝子之行幽人烈婦之誼天日可白其心風霜不

變其節尤足令人感泣流連而不能置使非詳而志之俾山川人物諸事蹟竟與荒烟蔓草同其湮沒豈非當事者一大缺典乎甚矣哉志之所關者大也余用是矢公矢慎取舊志而詳訂之採事實而補葺之爰集其編有五總其目凡十有二其間有考古者有証今者有古有而今廢者有昔畧而今詳者閱數月而其書始成用是勒之版章上之

彤庭俾在朝史臣執珥筆而書之曰某山某水是福

福山縣志

舊序

四

之形勝所存也某寺某院是福之古蹟所沿也納價若何陳詩若何是福之風土所宜也制度如何興祲祥如何見是福之吏治所關也磨科名者幾何人列縉紳者幾何人以德行文章傳者幾何人以忠孝節烈著者幾何人是又福之人文所係也上以備

聖天子賢相之求下以備冊府職方之考則福雖微而一邑之山川戶口人物風俗以及政教禮樂兵農錢穀諸大端庶得與一代之史相傳於不

朽云是爲序

康熙十二年歲次癸丑秋九月上浣吉邑人鹿

兆甲撰



舊志序

邑志之宜事於纂修也同心者積慮多年所矣
辛亥春曾謀之儼思潘侯而未果今年纂修通
志乃自閣臣條奏之部臣議之

皇上允而行之中外翼翼諸有司遂莫不以修志爲
先務邑侯東里羅公篤君子也治民旣克追國
僑之行政尤能文章有著作才承檄致我二三
邑人而命事余陪其後雖病不得辭旣受命愧
焉以怯惕焉以懼不敢怠借同人檢邑舊志取

福山縣志

舊序

六

裁焉顧邑建置日淺志僅寥寥具目乃爲之正
其體式廣其條列網其放失芟其蕪陋經營幾
如創始矣時烝暑藥餌楮管雜几上刻晷拮据
每有所作卽正之侯資其潤色事訖伏而言曰
治舉其大則細可畧義準其內則外可概郡縣
有志自班掾發原蓋顛周禮外史所掌者以史
乘較外也細也近世或修或否聽其官司或質
或艷因其人士事不隸於史館則其事不必盡
與實書不獻於天子則其書不必盡雅馴也固